

Awe mi ta drenta arena politico pa tur lista haya algo

E siman aki, a bin dilanti cu Tele Aruba mester para e propaganda politico di Pader Lampe y su partido RED.++++ Mirando e cambio cu a ser treci na Tele Aruba cu un gerencia nobo, por a pasa cu e gerencia aki no a cay riba e stipulacionnan cu tin di haber cu eleccion, ya cu ta prome biaha cu nan ta pasando den e periodo aki.++++Pero e ley cu tin riba pasamento di propaganda politico parce tin hopi buraco, pasobra ta mira programanan bao di capa gubernamental, y cu ta claramente propaganda politico, tanto na radio como na television.++++ Tin programanan cu ta ser pasa, cu claramente tin e toque politico su tras y riba esakinan no ta cay y tuma medida.++++ Na radionan mes tin programanan politico, di campaña, bao di capa y no por mishi cu nan tampoco.++++ Pober Comision di Bon Boluntad, no por haci nada tampoco, pasobra **NINGUN** partido ta respeta e comision, ni si nan a firma di lo haci esaki.++++ E comision tin dos experiencia tras di lomba caba y e mes historia ta keda ripiti cu cada eleccion.

MAS MEDIDA PA ARUBA IMITA

E dianan aki por a lesa di e ley cu —na Merca,— un estado kier introduci, pa prohibi humamento den auto.++++ Conociendo Aruba, lo no ta straño si nos politiconan bin imita esaki y trata na prohibi humamento den auto.++++ Lo bay sigur asina leu di hasta bini cu ley di prohibi comento den auto.++++ Mirando e situacion economico lo no ta straño tampoco si mañan nos bin tende cu ta bini **“zonne clause”**, pa hendenan cu tin cierto cantidad di aircu na cas, pasobra e cantidad di aircu na cas ta causa cu WEB mester gasta mas pa produci coriente pa Elmar.++++ Ahhh..... tin ainda un ley mas pa wordo imita. Esey ta esun cu Inglatera ta introduci.++++ E belasting aki ta **“belasting pa terror”**.++++ Investigacionnan na London ta causa e ciudad, o pais, casi 2 miyon florin pa dia y gobierno kier bini cu e belasting aki cu lo envolvi tambe investigacion di asesinatonan, traficacion di droga etc.++++ Laga nos prepara for di awor, pa tur cos cu nos gobernantenan por imagina, pa por saca placa pa paga e cantidad grandi di empleadonan publico cu ta drenta servicio prome cu dia 23 di september y despues di dia 23 di september.

ROLY TA HAYA SU PISCINA

Awe mi tin cu duna un pabien na ministro Ramon Lee pa e decision cu el a tuma, y combina cu esaki, e curashi politico.++++ Esaki ta di duna e piscina na Savaneta number di **“Piscina Roly Bisslik”**. Esaki ta un decision corecto, ya cu Roly a haci y ta significa hopi, pa e deporte aquatico di nos isla y merece e honor aki.++++ Ademas, mi ta haya cu Minister Ramon Lee a haci locual masha poco politico y hasta ministro lo haci; esta dedica un piscina na un persona cu riba tereno politico tabata su contrincante politico, su rival politico, perteneciendo na partido opositor.++++ E ministro no a mira e politico, ni contrincante politico ni rival politico, el a escohe pa duna **“Jack his Jacke”**, duna esun cu ta merece e honor, y esaki ta di admira.

MIHOR CERA BOCA PA MUSKITA

Nos a pasa den dos aña caminda cu Pader Lampe, den ring di boxeo pafo di misa, a haya golpi di derechazo pa izquerdazo, combina cu uppercut, manda cu tur dos braza y tambe cabezasos.++++ E no a cay y no a entrega.++++ El a keda para den ring pa sigui cu su pelea.++++ Ayera lesando di e autornan Lasana Sekou, Amiri Baraka y Fabian Adekunle Badejo di St. Maarten, mi a topa cu un frase cu a lanta mi interes: **“no one can remain indifferent toward that fascinating voice.....** voz di Pader Armando Lampe Ph d..++++ Si mi mester pensa manera hopi hende ta haciendo y sin razon, lo ta mihor pa mi no habri mi boca.++++ Con mi kier yama pader Lampe cierto nombernan of usa cierto palabranan contra dje, si e tabata coordinador di programa di Estudionan di Caribe na Universidad di Quintana Roo; si el a studia filosofia y teologia na Universidad Catolico di Nijmegen, sociologia na universidad Iberoamericano na Mexico, di Estudionan Latinoamericano na Universidad nacional Autonomo di Mexico, UNAM. Si el a doctora den ciencianan social y cultural na Universidad Liber di Amsterdam y si e ta autor o co-autor di varios buki riba historia general di misa na America Latina, y historia di cristianismo den Caribe, entre otro?++++ Pa Tur hende cu a yega e cumbre aki, ta sombre mester kita pa nan; sacerdote, politico o pa e persona cu e ta.++++ **Mi no ta laga muskita drenta mi boca.**

LISTANAN CASI CLA PA ELECCION

E listanan pa eleccion lo ta cla mañan mainta.++++ Mañan mainta pasobra ta conoci di pasado cu varios partido te na ultimo 10 minuutnan ta kibra cabez kende lo bay riba lista riba ki puesto.++++ Mañan atardi tur lista lo ta conoci y si encaso tur partido cu mester ricibi firma ainda, logra

esaki den e periodo nos dilanti, kico lo pasa si e milager tuma lugar?++++ Lagando **AVP/CDA, MEP, OLA y PPA** un banda, como partidonan cu a yega di goza di gobernacion, mi ta puntra mi mes, di con pueblo no ta scucha loke e otro partidonan ta trece dilanti.++++ No ta haci esey, pasobra e partidonan **“Chiquito”** manera nan ta ser yama, of partidonan **“nobo,”** pa hopi hende no ta di importancia, y hende tin miedo di **“tira nan voto afo,”** manera sa bisa.++++ Mi ta puntra mi mes si votadornan ta scucha loke integrantenan di **Democracia Real**, di Andin Bikker, ta trece dilanti. Loke **RED**, di Pader Lampe, ta informa; loke MPA di Monica Arends Kock, ta subraya den su ponencianan casi diariamente awor; loke 4 aña largo Alianza a muestra riba, loke Summum Bonum a trece dilanti den su conferencia di prensa y loke Gregorio Wolff di PPT ta suministra votadornan.++++ Nos ta mira mucho riba e lucha entre AVP/CDA y MEP, lubidando e otronan.++++ Imaginabo si e milager tuma lugar y cu e partidonan nobo di chiquito aki, logra 14 of 15 asiento di e 21. E ora ey e pueblo ta haya e gobierno cu e merece. Ta pueblo mes a vota, manera semper ta bisa. Esaki no ta **“wishfull thinking”** e ta **“un posibilidad”**. Den eleccion bo nunca sa!!

E BULADORNAN DI CURA

Continuamente mi ta tende menciona di e **“buladornan di cura”**.++++ Pa mi un bulador di cura ta un persona den parlamento pa un partido, y cu a muestra e partido cu e no ta di acuerdo cu cierto ponencia y ta bay vota cu e otronan cu asina ta haya un mayoria.++++ Despues e ta bira forma parti tambe di e otro partido.++++ E ora ey mi ta kere cu bo por tilda e persona di ta bulador di cura.++++ Kizas mi ta robez den mi ponencia aki. Mi no sa!! Pasobra hasta si mi ta miembro di parlamento, no ta PARTIDO mi ta representa, ta e PUEBLO. Den parlamento mi no mag conoce PARTIDO. (Na aruba ta partido y no pueblo ta conta)++++ Awor, si mi no ta di acuerdo cu politica di mi partido, y kier sigui den politica pero riba lista di otro partido, mi ta liber pa haci esaki. Mi no ta encadena na un partido.++++ Despues di e eleccion aki, nos lo mira hopi di loke nos lo tilda como **“bulador di cura”** y inhumamente.

Den tur partido bie u y nobo, tin hendenan masha capacita cu lo no drenta parlamento.++++ Di e partidonan nobo y chiquito, mi ta mira personanan masha capacita cu lo ta riba lista mañan. Y siguiendo e tradicion di voto arubano, hopi di e personanan debutante riba lista, lo no drenta parlamento. Esaki ta di lamenta!++++ Si e personanan aki den otro eleccion dicidi pa un of otro motibo di subi otro lista, no por bay tilda nan di ta **“bulador di cura”**, sin sa e motibo real di con nan a distancia di e partido anterior.++++ Si nan kier traha pa Aruba y no ta mira e posibilidad aki den e partido den cual nan ta(of tabata), nan tin tur derecho y libertad pa afilia na otro partido.++++ Nan no ta **“bulador di cura”**. E palabranan **“bulador di cura”** ta ser haci djs pa influencia hende contra e candidato, cu temor pa e candidato aki no haya e cantidad di voto cu e lo ta na caminda di haya.++++ Di mañan en adelante partidonan lo usa **“bulador di cura”** casi tur dia pa kibra nan rival.

E HUBENTUD DI CADA PARTIDO

E siman aki nos a cera conoci cu Yahoe (Yamando Hobennan Exitoso) di partido RED. Red Hubenil tin un bon persona hoben, energetico y dinamico su tras, y esey ta Melvin Quilotte. Si e hoben aki traha manera e sa traha, e lo por logra hopi cu Yahoe.++++ Den pasado nos ta corda cu AVP/CDA a tira ADRI den laira, y henter e campaña a lubida tur politico y partido, y tur hende tabata ADRI. E no a dura mucho den politica, y 4 aña pasa no por a haci comeback exitoso tampoco.++++ AVP/CDA a trata cu Edwin Abath, pero Edwin no tabata tin e forza di campaña di un ADRI su tras.++++ Edwin sin embargo a desaroya den bira un politico excelente.++++ PPA den decada 60 y principio di decada 70 tabata tin su Hubentud Patriotic, cu a saca cara solamente durante campaña y bay sosega despues.++++ Nan no a logra nada.++++ MEP a bin cu HOT y den campaña anterior a saca cara cu e candidata hoben Marisol Tromp cu a bira un di e vote-getternan mas grandi.++++ AVP/CDA a trata cu Otmir Oduber cu HAC, pero Otmir tampoco a resulta di ta un ADRI di campaña, sin embargo tambe a desaroya di bira un bon politico.++++ Awor ta pa mira kico Yahoe lo haci y si lo tende di HAC ta HOT of di HOT te HAC.++++ Den MEP e hoben Anthony Sneek a crece pafo di parlamento, pero su mala suerte ta cu el a tuma mucho e rumbo tradicional di politica.++++ No por keda sin menciona Artur Dowers di AVP/CDA cu ta un di e poco candidatonan cu no a drenta parlamento eleccion anterior y cu a keda den noticia tur e cuatro añanan cu ta tras di lomba y a desaroya su mes hopi tambe.++++ Otro cu hopi no a mira fuerte y cu tambe a crece ta Benny Sevinger di AVP/CDA.+++Di partido, mester aprecia e perseverancia di Alianza, cu a sa di sigui den noticia despues di eleccion di no a logra mas di 1666 voto, pero no a kibra, ni hala atras. CLA y ADN si a dal abao.

Juby Naar.